

四庫全書

史部

欽定四庫全書

史部

皇朝文獻通考卷一百二十六至
八

府丞臣龔駿文覆勘

欽定四庫全書

皇朝文獻通考卷一百二十六

臣禮考

朝儀

聖節朝賀

臣等謹按古者華封之祝見於陶唐天保之詩陳
於周雅朱子云人臣受恩無可以報謝者但言使
君壽考而已至於生辰受賀唐開元禮始有之元

宗手詔報左丞相源乾曜等所謂朝野同歡是為
美事者也宋志有紫宸殿上壽之文明制始與元
日冬至並稱三大節我

朝定制

萬壽聖節進表慶賀王以下文武官俱朝服七日

列聖相承皆以深仁厚澤淪浹人心每遇

聖節薄海臣民羣抒祝嘏之忱盖有不介以孚者

聖祖仁皇帝五旬六旬大慶及臨御之五十六十年諸臣

合詞請上

尊號皆謙而不居癸巳歲以六旬

萬壽

特頒恩詔遐邇均霑其詳載于

萬壽盛典一編

聖恩之渥自古所未有也

世宗憲皇帝五十聖壽禁止設立經壇

諭督撫不得進獻玩好

皇上御極以來恭儉惟德謙尊而光凡恭遇

萬壽慶辰必先期傳

諭內外臣工毋得購覓珍奇輒有進獻禁止各省士民

設經壇建碑亭之舉而且

特沛恩綸俾天下均霑樂利之休同登壽域尤仰見我
皇上敬

天法

祖德合無疆洵度千古矣

崇德元年定

萬壽聖節進表朝賀與元日同

二年十月己未

萬壽節

上御篤恭殿內外和碩親王多羅郡王多羅貝勒固山貝
子三順王及朝鮮質子文武各官上表稱賀進獻
鞍馬黃金緞疋等物

四年十月戊申

萬壽節

御殿受賀次日賜諸王貝勒文武羣臣大宴

五年十月壬申

萬壽節

頒詔大赦遂

御殿受朝賀賜諸臣宴於禮部是日內院大臣等奏請

御殿

上諭曰今日乃朕誕辰內外諸王貝勒及文武羣臣莫不

懼忤小民及罪人等亦應加恩令其同霑膏澤爾等可
於朕未御殿時先宣讀赦書宣畢來奏內院大臣等遂
出宣讀

寬溫仁聖皇帝詔曰朕恭膺寶錄敬迓鴻庥值壽域之宏
開敷天同慶宜仁風之普被率土均霑特頒肆赦之條
用沛好生之德茲萬壽之辰朕普施恩澤自諸王以下
以及庶民罔不沾被即有罪之人亦欲恩及之除十惡
外餘罪概行肆赦有以赦前事首告者法司不准審理

其已議而未經結案者赦之若赦後有隱匿偷盜者仍行治罪宣讀畢復奏

上乃御崇政殿受王公百官朝賀如儀

七年十月壬戌

萬壽節自二十二日至二十八日凡七日王以下章京以上俱朝服以國中方避痘停止作樂

順治三年正月令外藩蒙古各旗慶賀

聖誕進獻牛羊於每年元旦貢獻牛羊時一並奏進

八年四月定

萬壽聖節朝賀儀凡遇

萬壽節鹵簿大駕全設

上先詣

太廟行禮次詣

皇太后宮行禮畢陞太和殿鳴鐘鼓作樂諸王文武百官

行慶祝禮直省文官知州以上武官守備以上各

差官進慶祝表

十四年正月

萬壽節停止朝賀先期禮部奏行禮儀注

諭曰朕親政以來數年於茲雨暘未調盜賊未息民困未蘇方切儆惕今以生辰受賀彌覺不安至日

皇太后儀仗全設朕親詣行禮其諸王羣臣賀表及筵宴俱著停止

康熙元年三月辛卯

萬壽節

上率諸王大臣詣

聖祖母太皇太后宮

聖母皇太后兩宮行禮畢

御殿受諸王百官朝賀

四十二年三月癸丑

萬壽節停止朝賀筵宴是日

頒詔天下先是正月壬子諸王貝勒貝子公文武諸臣奏

今年三月十八日

皇上五旬大慶茲

聖駕巡視南河臣等請於

駕發之前豫行慶賀禮恭進鞍馬緞疋等物

上諭曰朕之誕辰爾等如此進獻在外督撫亦必效之朕必不受朕素嗜文學爾等諸臣有以詩文獻者朕當留覽焉既而大學士等及部院諸臣恭進慶祝

萬壽無疆屏

上復卻之於是大學士等及部院諸臣復以慶祝

萬壽屏文繕寫冊頁進呈奏曰臣等恭製此屏皆敷成我
皇上功德實事乞

賜留覽得

旨屏內所書之詞俱已載在冊頁朕留冊頁即與留屏無
異屆期

上詣

皇太后宮行禮停止朝賀仍

頒詔曰朕為天下民生主宵旰勤勞勵精圖治凡國家之

休戚閭閻之樂利晷刻之間無不注意於此天下之大
兆民之衆朕誰欺欺天乎今四十餘載親歷饑饉者不
知其幾南北用兵者不知其幾人心向背者不知其幾
天變地震者不知其幾自惟涼德不能撫育履冰臨淵
兢業惟守仰賴

上天眷佑

祖宗厚德幸生創業未久之際方免失墜今海寓昇平年
歲稍和生民俱已樂業邇來諸王大小臣工士庶因朕

五旬輿情肫切屢請加上尊號朕堅意固辭不允所請
蓋朕不以名譽稱揚為尚惟以海內富庶為心屢蠲賦
役頻省刑罰總欲使老安少懷風俗淳厚漸幾於康乂
隆平之治近因淮黃告成乃東南要務再授方略望其
善後朕不辭勞瘁親往閱視見畿輔山左江浙等省耆
老人民俱中心愛戴雖童穉亦咸歡欣瞻仰是知民心
皆一用是益深軫念視切如傷所以星夜回鑾茲特大
沛洪恩普施遐邇庶幾民生咸登壽域和氣徧滿寰區

安民則惠益宏逮下之仁御衆以寬聿溥好生之德布告天下咸使聞知

五十年三月丁未

萬壽節

御殿受朝賀先是諸王貝勒貝子公大臣官員等奏稱今當五十年昇平之會中外臣民喁喁引領懇祈

誕受尊號以慰輿情我

皇上德盛不居屢詔未允臣等不敢更請茲者恭遇

萬壽聖誕乃敷天率土衢歌封祝之時仰祈

御殿受賀以愜中外諸臣及士子兵民人等之望得

旨朕於壽日停止朝賀已二十餘年茲諸王羣臣以今歲

當五十年昇平之會特請御殿行禮以愜中外仰望之

心公疏奏陳詞意誠懇朕勉順羣情應如所請屆期

上率諸王貝勒貝子公內大臣大學士侍衛等詣

皇太后宮行禮畢

御殿王以下文武諸臣上表慶賀如儀停止筵宴

五十二年三月乙未以六旬

萬壽

御殿受朝賀

頒詔天下先是五十一年十一月諸王貝勒貝子公文武
諸臣等以明歲

萬壽六旬正誕請上

尊號

上不許至是年直省官員紳士耆庶先期赴

闕自三月初一日為始分建綵棚由西直門至

暢春園相屬二十里禮部奏言每歲恭遇

萬壽聖節王以下文武各官朝服七日在

暢春園蟒袍補服今歲恭遇

萬壽六旬大慶非尋常可比應自三月初一日起至月終

咸朝服蟒袍補褂嗣後每遇十年照此例行得

旨著自初一日至二十日三月戊寅朔

諭諸王貝勒貝子公大學士九卿等曰朕昨進京見各處

為朕六十壽誕慶賀保安祈福者不計其數朕實涼德
自覺媿汗從來帝王之治天下罔不以民生為念若為
一己之私即不能擴而充之矣朕若先知必令止之今
已成矣難違衆志夜來思之達旦朕為天下萬國蒼生
之主萬姓安即朕之安天下福即朕之福若能祈禱雨
暘時若家給人足則朕安寢飽食可以却病延年此
朕之求福非有妄想也傳之各處凡有祝延萬壽者必
以雨暘時若萬邦咸寧為先朕已老矣有若無實若虛

夙夜匪懈履薄臨深之念與日俱增豈敢自有滿假乎

壬辰諸王公內外羣臣恭進鞍馬緞疋等物却之

甲午

上奉

皇太后御輦陳大駕鹵簿由

暢春園回宮直隸各省官員士庶夾道跪迎耆老等

跪獻萬年壽觴

上停輦慰勞徧賜老人等壽桃及食品諸王貝勒貝子公

文武大臣官員兵丁並於誦經處跪迎

上霽容俯視皆賜以食品是日遣官祇告

天

地

宗廟

社稷

頒恩詔曰朕五十餘年上畏天命下凜民岩以敬以誠覃思上理且以一心對越

上帝未嘗瞬息稍懈賴

昊穹之孚佑

祖宗之蔭庇國家蓄積有餘民間年歲豐稔朕以涼德勉

思

列聖體大順公操心慮患敷景運於休期洪基業于光顯
夙夜兢兢宵旰靡遑屈指春秋年屆六旬矣覽自秦漢
以下稱帝者一百九十有三享祚縣長無如朕之久者
朕之虛薄良深歎仄何敢稍有倦怠以負孜孜圖治之

初心況在位之久者始勤終忽往往不能垂令名於後所以乾惕之懷彌殷憂勞之志愈切兼之承平歲久幅員日廣戶口漸增風俗日薄朕與臣鄰夙夜在茲以剛健中正惇大成裕謙尊有終持盈保泰猶恐未能豈自滿假少有逸豫朕以天下為心天下當亦體朕之衷各矢蓋誠皆敦孝敬型仁講讓守已奉公務勤職業官僚胥勸人士奮興使遐邇之均被小大之咸同以享昇平之福此非朕之德乃

天地

祖宗之賜今朕式慰中外臣民之情博考典禮大沛膏澤
用稱躋世於仁壽之至意於戲錫民以福為皇極得壽
之徵御衆以寬乃萬國咸寧之本布告天下咸使聞知
是日復

諭大學士等今歲天下老人為朕六旬大慶皆從數千里
匍匐而來如何令其空歸欲賜伊等筵宴然後遣回著
查八旗滿洲蒙古漢軍漢人大學士以下民以上年逾

六十五歲者奏聞擇日賜宴內有艱於動履不能前來者聽之其能來者即令之來即不能來者朕另行按分頒給今時漸炎熱賜宴後即令回籍耕種再查八旗滿洲蒙古漢軍以至包衣佐領下不論官員閒散人等年七十以上老婦亦著奏聞俟老人賜宴後再定一日送至

皇太后宮賜宴有艱於動履不能前來者聽之若有貧乏不能來者著各屬協助車馬使之前來俱開真實年歲

不可捏報再敕宗人府諸王以下宗室子孫內二十歲以下十歲以上選擇聰明堪供使令者六七十人令於耆老前執爵即朕子孫皆令之出宗室外不用他人也

乙未

萬壽節

上率諸王公大臣侍衛等詣

皇太后宮行禮畢

御殿王以下文武各官及致仕給還原品官員行慶賀禮

八旗兵丁直隸各省耆老士庶齊集

午門外

大清門內叩祝行禮

上回宮內大臣侍衛內閣翰林院禮部都察院詹事府等

衙門侍直官員詣

乾清門行禮是日

上奉

皇太后幸暢春園王以下滿漢文武官員直隸各省耆老

士庶仍于各誦經處跪送壬寅宴漢大臣官員士
庶年九十以上者三十三人八十以上者五百三
十八人七十以上者一千八百二十三人六十五
以上者一千八百四十六人於

暢春園正門內諸

皇子出視頒賜食品宗室子執爵授飲傳

諭諸老人曰今日之宴朕遣子孫宗室執爵授飲分頒食
品爾等與宴時勿得起立以示朕優待老人至意

上陞座命扶掖八十歲以上老人至

御前

親視飲酒又

諭曰書稱文王善養老孟子云七十者非帛不暖非肉不飽帝王之治天下發政施仁未嘗不以養老尊賢為首務近來士大夫只論居官之賢否而移風易俗之實政入孝出弟之本心未暇講究朕因今日之盛典特宣此意若孝弟之念少輕而求移風易俗其所厚者薄而其

所薄者厚矣爾等皆是老者比回鄉井之間各曉諭鄰里須先孝弟倘天下皆知孝弟為重此誠移風易俗之本禮樂道德之根非淺鮮也昨日甘霖大沛田野霑足朕心大悅爾等無誤農時速回本地特諭甲辰宴八旗大臣官員兵丁閒散等年九十以上者七人八十以上者一百九十二人七十以上者一千三百九十四人六十五以上者一千十二人于

暢春園正門前如前儀乙巳八旗滿洲蒙古漢軍老

婦齊集

暢春園

皇太后宮門前隨召九十歲以上者入宮門內八十以上者至丹墀下七十以上者集宮門外大臣妻年老者亦皆召至宮門內賜坐

皇太后

上親視頒賜茶果酒食等物其餘令諸

皇子率宗室子以次頒給又賜大臣妻衣飾綵緞數

珠銀兩賜八旗老婦白金各有差復准諸臣奏編纂

萬壽盛典

六十年三月

萬壽節停止行禮筵宴先是五十九年十二月諸王貝勒貝子公滿漢文武大臣等奏

皇上御極六十年普天大慶請行慶賀典禮

上諭大學士等曰朕素性不喜行慶賀禮是以元旦日惟

照例行禮停止筵宴雖萬壽日亦久不行慶賀禮今王大臣等為朕御極六十年奏請慶賀行禮欽惟

世祖章皇帝因朕幼年時未經出痘令保母護視于紫禁城外

父母膝下未得一日承歡此朕六十年來抱歎之處正月初七日

世祖章皇帝忌辰二月十一日

孝康章皇后忌辰朕何敢於正月初七二月十一日以前

行慶賀禮又見在西陲用兵地方官民運米送餉甚屬
勞苦山陝二年歉收民有流離者去歲陝省地震兵民
受傷今歲沙城地震即京城地亦微震正當君臣憂勤
求治之時何喜之有此所奏不准行至是年正月以

御極六十年大慶

命皇子等恭代告祭

永陵

福陵

昭陵二月

親謁

暫安奉殿

孝陵

孝東陵告祭遣官告祭

天

地

太廟

社稷三月諸王公大臣百官合詞請上

尊號曰聖神文武欽明濬哲大孝弘仁體元壽世至聖皇帝

上謙讓不許並

命停止慶賀及詔赦恩賚諸儀直省老人王年豐等詣

闕叩祝并進土產諸物皆却之仍賞賚有差

雍正元年十月

萬壽節停止朝賀筵宴令中外臣工毋得建立道場先是

七月

諭諸王大臣及內外文武各官朕惟自古帝王撫御寰區
治化隆盛中外臣民紀功述德頌禱情殷故天保之詩
卷阿之什擬升恒於日月期純嘏之彌長祝釐之詞形
諸歌詠者往往有之我

聖祖仁皇帝御極六十餘年至治神功參兩

天地深仁厚澤超邁百王溥海內外無不食德飲和淪肌
浹髓臣工黎庶無以致其感激愛戴之誠故每於

萬壽聖節京師暨直省各建道場誦經祝壽總因

聖祖仁皇帝恩德及人者至久感人者至深諸臣於無可報答之中勉竭忱悃以普天同慶之心儆華封稱祝之意在諸臣亦藉以自盡其心耳今朕嗣位之初夙夜祇懼不敢少懈所以立政圖治者安能及

聖祖之萬一爾諸臣於朕誕日倘仍照從前設立道場則自此以後將成定例在京王公以下及部院等官未免從事靡文稽遲公事在外文武大吏亦恐科派屬員貽

累地方且以有用之財供無益之費既非朕以勤儉勵
有位之心又非朕以康阜期海內之意尚虛文而無裨
實政朕甚無取焉特宣布中外於朕誕日毋得建立祝
壽道場但冀內外諸臣各殫厥心勉襄化理勤修職業
利濟蒼生以慰朕宵衣旰食之焦勞即不啻天保卷阿之
祝頌矣若不遵諭旨朕必加以處分不少寬貸

五年十月壬子

萬壽節停止朝賀筵宴是歲閏三月

諭內外諸臣曰朕聞會試舉人感朕特恩以今年為朕五十萬壽特於京城寺廟設立經壇以申頌祝之意此舉甚為虛妄朕臨御天下孜孜求治凡所行之事惟以循理為本誠以理之所在即天意所在感孚默應捷於影響若朕所行悉合于理則問心無愧之處即可以對越神明而輿情之頌祝與否皆可置之不問也朕儆戒乾惕之功無時或釋舉人乃平日讀書明理之人當效法古之聖賢豈可為此世俗妄誕之舉且朕正念士子貧

寒歸途艱于資斧是以賞給路費今乃費於無用之地
尤不能體朕之心矣其所設經壇即行禁止朕又聞各
省督撫因朕今年五十萬壽欲購覓玩好之物以為進
獻者此舉尤為不可夫地方大吏偶有進獻方物土產
者不過借此以達其瞻仰之意而朕之酌量收納則又
復隨便分賜廷臣者亦所以聯君臣上下之情若今年
亦只照每年之例備辦尚准其奏達朕前倘別有玩賞
之物則槩不寓目朕仰賴

皇考福庇在藩邸數十年所蓄器玩頗有及即位後見宮中傳貽古玩器皿皆質樸之物實無奇異為人所罕見者視朕藩邸所藏尚屬不逮朕深用抱愧於懷當日二阿哥在東宮時廣蓄奇巧珍貴之物數倍於

皇考宮中之所有朕仰思

皇考恭儉至德實可垂法萬世欽服之誠切於五內益覺二阿哥之所為當為鑒戒也朕既深知二阿哥之非若此時復留心玩好廣收進獻則將來子孫之賢而有識

者豈不以此為朕躬之累乎朕意欲俟暇時將宮中所
有之物或為

皇考傳留或朕藩邸舊蓄一一分晰標記以明

皇考之儉德俾世世子孫共知之又安肯多收玩好以滋
朕心之愧乎朕澄清吏治令督撫諸臣共勵廉隅即量
予公費不過供其日用之需安有餘資搜求玩器倘轉
索之於屬員則又開下吏逢迎奔競之漸尚望其秉公
督率整飭官方乎朕心惟以民安物阜為美薦賢舉能

為貴倘督撫等秉公察吏實心為國行一利民之政勝於獻希世之珍也薦一可用之才勝于貢連城之寶也當年

皇考五十萬壽時朕再三懇請慶賀不蒙

俞允今朕五十壽誕躬自舉行於心實有未安至于設立經壇建立碑亭等事在

皇考當日甚鄙而厭之因見諸臣籲懇之切隨便聽其舉行乃朕所深悉者而其中羣下隱情在

皇考實不能深知朕居子臣之位四十年於臣庶情形皆所親見是以不肯復為內外諸臣其共體朕心祇遵朕諭殫極誠意屏絕虛文勉之勉之四月復

諭曰朕今年五十已有諭旨不行慶賀禮昨楊名時南天祥奏摺俱稱今年進京慶祝萬壽朕思

聖祖仁皇帝久道化成聖德神功際天蟠地當年五十

聖壽之時尚未允行慶賀之禮朕臨御以來雖時時有勵精圖治之念又安海宇之心而實在善政善教可以造

福於

社稷蒼生者何事可以自信正當羣臣交相儆勉期於有成又安可為此粉飾之事以滋煩擾乎朕之待下惟有一誠諸臣果矢誠懇之念於隱微寤寐之中尊君親上如詩書所載元后父母之誼豈不勝於拜舞彤墀效稱觴祝嘏之儀節乎外任諸臣俱不必具本奏請來京只照常年之例行若有因地方事務應來陛見者朕自另降諭旨其各省耆民等若有欲來京慶祝者地方官切

止之高年之人長途跋涉未免勞頓非朕體恤之意倘違朕旨而來俱不許奏聞朕亦不加以恩賜伊等若果有感恩戴德之忱何不訓誨子弟勸導鄉人使各為善良各務本業而乃僕僕道路以為報效朝廷乎再各省地方若有指稱萬壽建立經壇或聚集梨園誼譁糜費者此皆生事不安本分之徒誘惑愚人希圖財利尤宜嚴禁倘地方官不行禁止經朕訪聞定照欺罔之律治罪將此通行各省並轉飭各府州縣咸使聞知

乾隆元年八月甲戌

萬壽節

上詣

雍和宮行禮畢還

宮詣

皇太后宮行禮停止慶賀是月

諭諸臣曰朕前降旨三年之內不行慶賀禮今八月十三日為朕誕辰禮部循例題請已降旨停止行禮並

令朝臣勿穿蟒袍補服所有外省慶賀本章俱著內閣發還

五年八月辛亥

萬壽節

御殿受朝賀前期

諭曰八月十三日為朕誕辰聞內外臣工以今年為三十萬壽之期欲行慶賀貢獻之禮朕甚不取今年春間外省督撫提臣中有請八月進京陛見者朕批諭

止之蓋朕年甫及壯不言慶賀且朕所望于內外臣
工者總在實心實政為國家宣猷効力不在稱觴祝
嘏之儀文著即傳諭內外臣工等仍照常年之例行
若有在常例之外者俱著停止

六年八月庚戌

萬壽節時

駕幸熱河

上詣

皇太后宮行禮畢

御行殿扈從諸王貝勒貝子公文武大臣官員暨外藩
蒙古王以下各官行慶賀禮先是七月禮部奏言

八月十三日

萬壽聖節恭遇

聖駕巡幸扈從王大臣官員應于

行宮前行慶賀禮其班位王公大臣在網城內三品

以下官在網城外在京王公大臣官員於

午門前行慶賀禮其筵宴應行停止從之

臣等謹按

行幸日恭遇

聖誕慶賀之儀於是年禮部奏定嗣後每歲

巡幸熱河恭遇

聖節俱照此例

十五年八月癸未

萬壽節

御殿受朝賀是歲四月

諭曰今年八月為朕四十壽辰閱督撫諸臣奏摺有陳請來京慶祝者各省將軍督撫皆有封疆重任宜有概離職守來京慶祝之理一處陳請他處從而效之若明知不能悉允所請而各繕本章往來批答徒成具文宜君臣間以至誠相孚之誼耶當年

皇祖聖祖仁皇帝四十五十聖壽

皇考世宗憲皇帝五十聖壽俱未行慶賀禮

皇祖壽登六十始允臣民之請舉行慶賀今朕四十壽辰
未屆應行祝嘏之時何必遽事紛紛陳奏著傳諭各
省文武大臣不必具摺奏請來京諸臣其明體朕意

二十五年八月甲申

萬壽節

御殿受朝賀先是二十四年十月

諭內閣曰雍正五年恭值

皇考五十萬壽因會試舉人請於京城寺廟設立經壇以

申頌祝欽蒙

頒諭禁止並

敕各直省督撫毋得以萬壽進獻玩好

聖訓有云朕心惟以民安物阜為美薦賢舉能為貴倘督撫等秉公察吏實心為國行一利民之政勝於獻希世之珍舉一可用之才勝於貢連城之寶仰見我

皇考恭儉聖德實為萬世訓行朕嗣服以來屢諭各督撫等不得於方外之物別有進獻諒內外大小臣工無

不明體朕意開歲八月為朕五十誕辰惟恐臣僚中
或以萬壽聖節欲購覓珍奇共申祝嘏其各省士民
或且有設立經壇建立碑亭之事非先期詳悉傳諭
必將競事浮華徒滋糜費甚非所以勵官常惜物力
也朕心深所不取其飭禁之至在籍年老諸臣如尚
書沈德潛侍郎錢陳羣等若以隨班叩祝跋涉遠來
亦非朕優禮老人之意況辛巳恭遇

聖母皇太后七十大慶以新春敬奉

安輿時巡南服諸臣就近迎鑾相見不遠又何必僕僕道
路為耶著將此通行傳諭知之至是歲七月

諭曰今年為朕五十誕辰已降旨臣工等不得以合詞
慶祝踵事繁文至督撫等各進土宜方物朕不過以
其封疆大吏藉聯上下之情未可徑斥若藩臬兩司
其位次本不宜貢獻前庚午年早經傳旨飭禁惟託
庸等數人以蕪管闕差織造故不在遣卻之列乃今
日調任甘肅布政使許松侑具摺進貢微特不悉朕

意於體制亦屬冒昧已飭奏事處發還恐直省各員未能遍曉效尤之習不可不防其漸將此宣諭知之

三十五年八月辛卯

萬壽節

御殿受朝賀先是三十四年八月

諭內閣曰前者朕五十誕辰恐直省臣民有啟經壇立

碑亭貢獻稱祝之事或致糜耗物力曾預飭禁止茲

明年八月屆朕六十正誕意中外耆庶必有以週甲

聖節非五旬大慶比欲申祝釐以抒愛戴者情固難
却而非朕心所樂從用是明切宣示朕臨御三十四
年以來承

累洽重熙之盛海宇乂寧民氣恬樂復仰荷

上蒼眷佑連歲屢豐方思上答

鴻庥宏敷閭澤以嘉惠吾民益臻熙阜國家之瑞莫大於
此且越歲辛卯即恭遇

聖母皇太后萬壽

璇闈慶典亘古希逢朕將率天下臣民臚歡舞綵敬迓
慈禧自當聽衢巷謳歌共展

尊親之義又何必因朕躬慶辰頻年祝嘏多此繁文縟節
為哉其布告天下咸體朕意一切仍遵二十四年所降
諭旨不必舉行各省督撫不必以來京叩祝為請並
不必進奉珍玩及綉緞表裏等物至在籍大臣中如
尚書沈德潛壽屆期頤錢陳羣亦年逾八秩不宜復
以遠涉勞筋力已諄復傳諭令其無庸親詣京師叩祝

俾黃髮耆臣領袖江鄉父老攜杖呼嵩為熙朝盛事
不亦美歟著將此通行傳諭知之是年四月

諭曰本年為朕六旬慶辰中外臣民或有以週甲聖節
籲請祝釐者雖出愛戴至誠但崇尚繁文必至耗糜
物力朕心不以為然昨歲已明降諭旨預為飭禁今
據高晉奏稱江南士民擬在該處各寺觀建壇嘑經
演戲稱祝者殊為未喻朕旨朕臨御三十五年以來
祇膺

昊蒼鴻眷寰宇乂寧民氣和樂惟期推仁究澤嘉惠海內
元元益臻康阜國家上瑞莫大於是況歲屆辛卯恭
逢

聖母皇太后八旬萬壽朕將率天下臣工耆庶舞綵臚歡
敬迓

慈禧而隆慶典若因朕躬誕辰頻年稱祝致令多方預備
朕心實所不取該督等誠切呼嵩屆期祇須率領官
吏紳士于萬壽宮照常行禮慶祝已足共抒忱悃所

有建壇演戲等事概不必行高晉既有此奏恐他省亦有似此瀆陳者實非朕所樂聞著再通行明切曉諭咸體朕意毋有所請閏五月

諭曰今日各部旗大臣等具奏以本年為朕六旬慶辰請于御園預備稱祝所奏不必行園中地本不寬勢難令文武大臣聯班並列且越歲辛卯恭遇

聖母皇太后八旬萬壽普天慶洽朕將躬率臣工舞綵臚歡以敬迓

慈禧宏敷慶典九卿等屆期自可共抒忭蹈之誠若因朕躬誕辰頻年稱祝為此無益之舉實非朕所樂從昨歲恐中外臣民因朕週甲聖節籲請建設經壇延釐祝嘏徒致耗糜物力已明降諭旨預為飭禁今復思大臣中有因萬壽備物獻者伊等身膺顯秩藉此以申忱悃原非過分但亦當予以限制如內而大學士尚書都統外而總督巡撫尚可允其奏進其在京侍郎副都統以下併外省提鎮學政藩臬等人數既繁

若紛紛呈進在諸臣既徒事分心購辦進覽時朕又增檢閱之煩甚無謂也所有伊等預備之處概不必行並勅奏事處毋許傳進七月禮部奏八月十三日皇上六旬聖節請舉行典禮奉

諭照例行禮所有筵宴已于元旦舉行本日著停止至八月大學士奏恭逢

萬壽聖節各省在籍大小臣工來京多備有詩冊除大臣例得奏進其餘品秩小者請令自赴吏部投遞

彙交軍機處開單進呈奉

旨著交禮部丙戌

皇上六旬萬壽聖節

上詣

奉先殿行禮率王公大臣等詣

慈寧宮行慶賀禮隨

御太和殿受王公文武百官行慶賀禮禮畢

上奉

皇太后於壽安宮侍早晚膳

賜宗室王公內廷大臣及諸外藩回部鄂堆等宴

四十五年八月己未

萬壽節

御殿受朝賀先是四十四年八月

諭曰前因江浙督撫等以兩省臣民望幸奏請巡閱河
工海塘已降旨允於庚子春正月諏吉南巡至所稱
明歲為朕七旬萬壽欲就近申祝則斷乎不可業經

宣諭飭禁蓋朕本意原以庚子為朕七旬誕辰辛丑

即

聖母九旬萬壽連歲疊逢大慶中外臚歡自可聽其抒誠

祝

嘏今既不能遂朕初願朕復何以為己稱慶惟念士民想
望恩澤積有歲年因詔開鄉會恩科並輪免各省漕
糧一週以洽羣憫明年南巡迴鑾後俟

北郊禮成即啟程幸避暑山莊駐蹕八月慶辰一切仍照

常例行若在京受賀惟恐轉多裱觸遂至山莊以避之至於西藏班禪額爾德尼預請覲祝實屬吉祥盛事是以允其前來即令於山莊瞻謁俾從其便朕并非因其稱祝先期往就之也恐內外臣工尚未能深喻朕意仍有以慶典為請者非惟不能博朕之悅適以增朕之懷又豈臣子愛敬之道俟朕八旬大慶則當聽從諸臣稱祝此次必不允行又前屆朕六旬萬壽時自古北口熱河兩處曾有點綴段落燈綵之類

本屬朕所不取明年尤當嚴禁將此再行通諭知之
至是歲正月朔庚辰

上御中和殿陞座內大臣侍衛暨內閣翰林院詹事府
禮部樂部都察院等衙門官員行慶賀禮畢

御太和殿陞座諸王貝勒貝子文武大臣官員及來朝
外藩蒙古哈薩克回部王貝勒貝子公台吉等朝
鮮諸國陪臣進表行慶賀禮畢

頒詔天下

詔曰朕統御寰區勤求郅治茂時育物畏懼滋深仰賴
上蒼眷佑

列聖貽庥海宇敕寧輿圖式廓攸攸夙夜於今四十五年

春秋正屆七旬緬惟

皇祖聖祖仁皇帝法

天行健久道化成我

皇考世宗憲皇帝丕繼

鴻謨厚澤深仁淪肌浹髓朕祇適寅虔不敢暇逸以承

前烈惟真實心實政永底昇平至如臣工慶賀繁文槩所
弗取第念中外臣民企慕瞻依彌形篤摯已於乾隆
四十三年降旨普免天下錢糧並特開鄉會試恩科
以宏樂利之庥以廣作人之化今茲履端協慶率土
咸熙允宜俯協輿情溥施大澤我

皇祖六旬萬壽曾特頒

恩詔遐邇均霑朕惟以

皇祖之心為心覃敷閭澤嘉與天下臣民共躋仁壽用稱

朕敬

天法

祖加惠黎元之至意於戲惠此萬方俾緝熙于純嘏敘時
五福用敷錫厥庶民布告天下咸使聞知三月癸未
諭曰前以庚子年為朕七旬萬壽恐內外臣工欲申祝
嘏屢經宣諭飭禁此次南巡回鑾後一俟

北郊禮成即啟程幸避暑山莊各督撫等皆不必前來稱
祝更恐外省督撫不能仰體朕懷聞因七旬萬壽有

取九九之義購備貢品誇多鬪靡甚至力有不逮而
隨衆效尤勉為充數尤屬不必各省督撫身任封疆
惟當大法小廉奉公勤職副朕委任本不當以進奉
見長著再傳諭各督撫今年八月慶辰一切仍照常
例若借七旬萬壽為名多事繁文以申媚茲之悃不
但為朕所不取且現今降旨令奏事處屆期遇有多
進貢物著一概不准接收諸臣其善體朕意毋得藉辭
請覲致增煩費轉滋擾瀆將此通諭各督撫知之七月

丁酉班禪額爾德尼自後藏來恭祝

萬壽至

避暑山莊於

澹泊敬誠殿丹墀跪請

聖安

上於依清曠殿

賜茶慰問

賜茶畢

上詣寶筏詣

烟波致爽

雲山勝地各佛堂拈香班禪額爾德尼從禮畢

上還宮

八月己未

萬壽聖節

上御澹泊敬誠殿受王公大臣官員及蒙古王公貝勒
額駙台吉回部郡王霍集斯等並阿哥木伯克貝

子色提布阿爾第等十一人杜爾伯特汗瑪克蘇
爾扎布等五人土爾扈特汗策凌那木扎爾等九
人朝鮮正使錦城尉朴明源等三人烏梁海散秩
大臣伊素特等三人喀什噶爾四品噶咱納齊伯
克愛達爾之子烏魯克等三人木坪宣慰司堅木
叅囊康等四十四人行慶賀禮禮畢並

命隨至卷阿勝境

賜茶果

四十八年停止

萬壽慶節內外臣工貢物先是二月

諭曰向來內外臣工每于萬壽慶節備物呈進率成例

事今歲秋間朕自熱河啟鑾詣盛京恭謁

祖陵蹕路經由蒙古部落道里較遠長途繁費更多未便

所有本年萬壽貢物不必先期齎赴熱河呈進王公

大臣各省督撫等務期仰體朕意毋滋煩瀆將此通

諭知之八月又奉

諭曰朝鮮列在外藩勤修職貢最為恭順今以朕臨幸
盛京遣陪臣賁表修貢迎駕請安並祝萬壽藉抒忱
悃甚屬可嘉著屆時當加恩賚以示優眷著禮部堂
官傳諭知之

盛京朝賀

臣等謹案恭遇

皇帝恭謁

祖陵

巡幸盛京

駕至之次日

御殿受朝賀與在京朝賀同今附載於三大節朝賀之後

雍正六年定

盛京文武各官朝賀照在京文武官品級序定班次
乾隆四十八年八月奉

諭曰此次前往盛京遇陞殿慶賀行禮所有隨從王公

大臣俱著穿蟒袍補褂毋庸攜帶朝服其盛京官員亦著一體穿蟒袍補褂行禮至尊藏

冊寶行禮時亦並著穿蟒袍補褂

盛京朝賀儀

皇帝至

盛京扈從之王公各官咸朝服豫至

大清門候

駕入

陞崇政殿

賜茶畢

皇帝入宮各退

右恭迎

聖駕進宮

次日早陳

法駕鹵簿於

崇政殿前陳中和韶樂於

殿檐下二層階臺下之兩旁陳丹陛大樂於兩旁樂

亭

乾隆八年奏請建設一分丹陛大樂一分留

盛京樂懸以中和韶樂盛京禮部衙門朝賀

時樂部會同禮部恭設

設

詔案表案各一於

崇政殿東之南又設黃案一於丹墀正中設黃蓋雲

盤於丹墀內

如不蓋雲盤及

頒詔

不設黃

本部堂官奉

王以下文武各官所進慶賀表恭設于

殿內東旁案上內閣學士恭奉

詔書安設于

殿內東邊黃案上

右陳設

鴻臚寺官引隨

皇子以下各官俱蟒袍補服和碩親王以下入八分

公以上于

皇太后行宮外按翼排立文武各官及朝鮮使臣于

大清門外按翼排立執事官豫設

皇帝拜褥於

皇太后行宮門外正中本部堂官奏請

皇帝具禮服出宮于東旁門內乘輿本部堂官前引至
皇太后行宮門外降輿東旁立本部堂官轉傳內監奏請
皇太后陞座本部堂官引

皇帝至拜褥上立王以下文武各官俱向上立鳴贊官
奏跪拜興

皇帝率皇子王公行三跪九拜禮興文武各官及朝鮮

陪臣于

大清門外隨行禮禮成本部堂官引

皇帝仍至原位立轉傳內監奏請

皇太后還宮本部堂官奏禮成引

皇帝還宮皆退

以上係乾隆十九年定

右朝賀

皇太后儀

鴻臚寺官引隨

駕皇子王公並外藩王公等在

殿外兩旁立引隨

駕之文武大臣官員在丹墀東旁各按品級侍立引

盛京文武大臣官員並

陵寢官員在丹墀西旁各按品級侍立引朝鮮使臣於丹墀西旁百官之末侍立耆老領催等皆齊集于

大清門外屆時本部堂官奏請

皇帝御龍袍袞服乘輿出宮本部堂官恭導

皇帝陞

崇政殿寶座中和韶樂作奏咸平之章

皇帝陞座樂止鑾儀衛官贊鳴鞭丹墀內三鳴鞭鳴贊

官贊排班鴻臚寺官引

皇子以下文武各官並朝鮮國使臣排班

朝鮮使臣
向例另班

行禮乾隆四十八年具奏
禮成慶賀事宜令朝鮮使臣附于西班末

謁陵

右序班

丹陛樂作鳴贊官贊進贊跪贊宣

表宣表官至黃案前捧

表跪于

殿檐下正中大學士二人跪于左右展

表樂止宣表官宣畢捧

表起立丹陛樂作奏慶平之章捧表官捧

表置于黃案上退鳴贊官贊叩興行三跪九叩禮興

鳴贊官贊退皆退復原位立樂止大學士奉

詔書至

崇政殿檐下授本部堂官跪受由中階左旁至丹陛
正中安設于黃案上行一跪三叩禮跪奉

詔書起本部堂官奉雲盤受

詔書安置雲盤內興黃蓋前導由中道出

大清門文武各官隨出

皇帝賜王公大臣坐

賜茶畢鑾儀衛官鳴鞭王以下皆起立中和韶樂作奏

和平之章

皇帝還宮本部堂官奉

詔書至

大清門外安設龍亭與

京師頒

詔儀同

右宣表

皇后率

妃

嬪慶賀

皇帝行禮與

皇太后行宮慶賀行禮

妃

嬪于

皇后前慶賀行禮並與

京師儀同

盛京官員每歲恭遇

皇帝萬壽及元旦冬至行朝賀禮

屆期內務府官詣

宗政殿啟扉拂拭

御座禮部官恭設香案于

殿外正中南向辨百官位于丹墀內按旗分左右翼

東班西上西班牙東上均北面鳴贊二員分立班行

之北引班二員分立班左右

贊禮
郎充

均東西面文武

各官咸朝於

大清門外祇候俟屆時引班分引至

崇政殿丹墀內鳴贊贊齊班引班引各官就拜位立
贊進贊跪叩興百官行三跪九叩禮贊退引班引
各官退

盛京朝賀糾儀以

盛京禮部司官二人

直省朝賀

臣等謹案凡恭遇

闕行禮之儀今附載于三大節朝賀之後

順治八年定三大節在外文武官均設香案朝服望闕行禮與京朝官同

康熙二十二年定直省朝賀班位凡直省班次將軍總督加將軍銜提督為一班巡撫副都統提督加左右都督銜總兵官

乾隆十八年裁加銜

為二班加都督

同知以下銜總兵官協領叅領巡鹽御史織造郎

中督闕郎中布政使按察使各道為三班佐領督
闕員外郎知府副將叅將為四班防禦督闕主事
司庫同知通判遊擊都司為五班驍騎校知州知
縣守備為六班有品級筆帖式有品級庫使經歷
州同州判縣丞千總等官為七班滿洲蒙古漢軍
官分兩翼漢官分文東武西

雍正八年令外省朝賀設糾儀官凡直省望

闕朝賀設糾儀官省會以道員一人如無道員用府

同知一人外府以同知一人無同知則用通判無
同知通判則用教官一人州縣俱用教官一人屆
期糾儀官黎明先至文武各官行禮時糾儀官旁
立監視禮儀如有越次失儀及遲誤不到者糾儀
官揭報督撫指名題叅凡遇有

欽差人員一二品大臣列在第一班之首三品以下之
京堂列在第二班之首五品以下之部院官員均
列在第二班之末

皇朝文獻通考卷一百二十六

欽定四庫全書

皇朝文獻通考卷一百二十七

王禮考三

朝儀

常朝

謝

恩儀附

臣等謹按常朝之禮唐時有朔望御太極殿文武
職事官九品以上皆入朝文官五品以上日參號
常參官武官三品以上三日一朝號九參官五品

以上五日一朝號六參官宋初以文德殿入閣為
常朝之盛禮文武官每日赴文德殿正衙曰常參
五日一赴崇德殿或垂拱殿曰起居熙寧以後罷
入閣儀始定月朔御文德殿望日御紫宸殿而常
參六參朔望參其儀不廢由金訖明朝參常朝制
亦與唐宋等

本朝大典以每月五日十五日二十五日為常朝之
期先期鴻臚寺奏請

御殿王公百官應謝

恩者及外國陪臣以次行禮若不

御殿則王公列坐於

太和門外百官列坐於

午門外內務府官列坐於

右翼門外糾儀官察其失儀者移時乃退所以昭儀
度而辨品秩也若夫常朝之外八旗官員則於月
朔及十日二十日坐班左右翼王公分單雙日坐

班上三旗領侍衛大臣侍衛等每日坐班滿漢御史司員各加糾察是仿唐宋常參六參之意而益精詳也今皆著於篇

崇德元年定每月初五十五二十五日

御殿聽政及各官謝

恩儀凡王以下各官遇陞賞等事於每月常朝日行謝恩禮王貝勒貝子等謝

恩者皆啟奏進內行禮官員有功陞賞者亦啟奏進內

行禮其因事謝

恩者於

大清門外行禮革職官不許具朝服行禮外藩王貝

勒貝子及外藩官謝

恩亦於常朝日行禮凡王以下文武官陞遷謝

恩者行三跪九叩禮

賜銀幣等物行二跪六叩禮

賜食行一跪三叩禮凡賞賚謝

恩皆常服不贊是歲五月諸王貝勒等以

賜儀仗皆入

清寧宮丹墀謝

恩次衆官欲謝

恩禮部官奏曰官員甚衆若俱入

清寧宮丹墀行禮恐不能容札蘭章京以下應於

大清門外行禮

太宗文皇帝曰向例惟獲罪官員方在外遠處謝恩豈可

因人多不容遂令門外行禮乎因俱令入內行禮

八年命吏部定王貝勒貝子公等失誤朝會處分
例凡常朝之期有一次不到者親王罰大牛一郡
王罰中牛一貝勒罰中次牛一貝子罰小牛一公
等罰羊一若借稱有事失誤朝會者送法司治罪
順治八年九月重定謝

恩儀禮部擬定儀注王以下各官以上陞級授官謝

恩王貝勒貝子公大臣等出師凱旋受賞謝

恩王以下文武各官以上及喀爾喀貢使朝見俱設鹵簿奏樂鳴鐘鼓

上御太和殿鳴贊官唱贊行禮王以下官員以上

欽命婚娶者或於

中和殿或於

位育宮俱朝服行禮不唱贊其不時賞賚謝

恩便服行禮亦不唱贊從之

九年二月定常朝之期禮部議覆科臣楊黃疏言

舊例百官每月十一朝似太煩數今應於每月初五十五二十五日

上御太和殿在京文武百官俱穿朝服入朝行朝參禮
凡陞選起用及朝見辭朝等官有應面朝者俱於
太和殿前丹墀行禮其餘俱於

午門外行禮從之

八月定常朝儀凡朝期

上御太和殿鹵簿全設奏中和丹陛樂鳴鐘鼓鳴鞭內

大臣侍衛列殿內兩傍王以下輔國公以上集於
常朝房文武各官列

午門外其謝

恩辭朝陞見等官該部分別應在內在外行禮先期奏
聞親王以下文武官進爵陞官及王貝勒貝子公大臣
出征凱旋賞賚及諸恩賜俱於常朝日進內聽唱
贊行禮漢軍漢人官員赴任及外省朝覲應行禮
各官亦進內行禮應在外行禮各官俱於

午門外行禮如是日不

御殿赴任及朝見官員均在

午門外行禮外藩王以下公台吉以上來朝及喀爾喀厄魯特諸部落入貢使臣亦於常朝日行禮

又定八旗武官坐班儀凡八旗武官除大朝常朝外每月初一初十二十日具公服於

午門外分翼坐班如遇

巡幸除朝期外每日於

午門外坐班用常服

十年定常朝日謝

恩見辭文武官四品以上

太和殿前行禮五品以下

午門外行禮

十二年定朝期王以下公以上在

午門內朝房齊集

又禮部奏嗣後常朝

御殿謝

恩各官行禮諸王貝勒貝子公等應進

殿兩旁排立俟各官行禮畢

賜茶候

旨列坐俟

駕還宮方出從之

十八年定王公百官行禮位次凡大朝及常朝親王以下入八分公以上在丹陛上行禮不入分公

以下於丹墀內行禮

又定常朝日如遇

御殿文武陞賞各官及京官外陞外官來京應行禮者

不論品級皆於

殿前行禮如免朝於

午門外行禮

康熙九年令都察院糾察諸王大臣失儀者

諭都察院曰國家朝儀大體所在貴於整肅嚴飭不止係

堂陛之觀瞻亦以見臣心之敬肆諸王大臣有踰越班
行交相接語或輕佻嬉笑禮不踰階而相與言又況其
甚乎爾衙門監察御史侍班切近見而不糾皆緣畏事
徇情所以如此都察院職任重大朕躬有失尚爾指陳
王及諸臣乃不參奏揆之事理實所未協今後有失儀
者毋得容隱

十年禮部議準凡遇應具朝服日奏事官咸朝服
補服違者本部指叅

十二年又議準官員宜具朝服日而服不如制者
罰俸一月

十四年禮部議每月常朝日

御殿行禮後羣臣入內奏事止具補服如不

御殿仍具朝服

二十年設常朝糾儀御史及司員凡常朝及八旗
上朝坐班之日班首以滿漢御史各一人班末以
滿漢御史各一人吏部禮部亦委滿漢司官監察

如有越次私語或互相背坐及先自起散者指名題參

雍正二年三月遣侍衛四人監察朝班凡常朝日遣侍衛四人監看如有坐立越班跪拜失儀御史指示侍衛即指名拿參交刑部治罪

又定凡

御殿日未明以前鴻臚寺官左右各二人引左右翼官從兩掖門入各就本班坐鼓嚴咸起立聽唱贊由

仗南引進依次排班行禮

乾隆元年三月

諭曰每月逢五朝期鴻臚寺照例奏請御殿朕雖未准行而未經降旨曉諭蓋此二十七月之內如遇國家重大典禮萬不可已者間一御殿外此概不舉行從前諭旨甚為明晰似此朝會常儀理應停止俟二十七月之後再行奏請

又奉

諭嗣後御門聽政若遇逢五日朝期各官咸補服奏事
不必用朝服永著為令

二年申嚴常朝坐班儀凡朝期除

內廷行走各官外凡滿漢文武大小官均於黎明齊
集坐班如有事故先期於朝單內聲明至期都察
院吏禮二部官稽察有無故不到者指名叅奏

三年定每月八旗官員坐班日

初一日 初十日禮部兵

部各派司官二人稽察

又定文武月選官謝

恩儀凡文武官選授之後吏兵二部開列名單知會鴻臚寺俟領憑領劄十日之內鴻臚寺傳集演禮四品以上於

午門外五品以下於

天安門外謝

恩逾期不到者四品以上由鴻臚寺指名題叅四品以下送吏兵二部察議彙奏

六年奏准每逢朝期八旗官員除有公事外不赴朝班者稽察御史會同該部將官員過少旗分察明緣由指叅交部察議

七年六月

諭內閣昨日陞殿遇雨謝恩大臣官員及御前侍衛乾清門侍衛大門侍衛內務府官員等冠服未免濡濕著各賞給正俸之半

十六年七月

諭此次陞殿行禮時遇雨露濕衣帽之大臣官員等著
各賞給正俸半年御前大臣侍衛乾清門侍衛亦照
此賞給

十二月禮部奏上朝官員宜朝服親投職名由東
西掖門分入以便稽察常朝坐班各部院大臣宜
董率庶僚按期到班毋許曠闕從之

十七年四月禮部奏常朝坐班向無定時今定春
冬以辰正夏秋以卯正屆時各官依次列坐後至

者指叅從之

又定各部院堂官惟實有事故不能到班方許於冊內聲明若遇本署奏事仍留一人率屬就列毋得曠闕

二十八年七月更定外官謝

恩例凡文武月選官于給發憑劄日齊集吏兵二部先期行知鴻臚寺派員率領謝

恩其各省揀發陞調薦舉卓異預行保舉官員例應給

照者由部彙齊人數定期知照鴻臚寺率領謝

恩再行給照赴任

二十九年六月更定外官謝

恩例凡外任文武各官引

見後仍令吏兵二部將職名咨送鴻臚寺由寺定期傳

示帶領謝

恩三傳不到者鴻臚寺按季彙參

三十五年定外藩使臣朝賀儀凡外藩使臣來京

應入於何班朝賀俱由禮部先期奏請是年猛拱
頭目興堂札貢象來京奉

旨隨五品班之末行禮又蒿漢使臣來京奏准入於三
品班之末行禮

三十八年哈薩克阿布賴遣子阿第勒素坦來京
禮部具奏行禮班次奉

旨交軍機大臣查奏入於蒙古公之次回子之前其同
來瑪木克等入於三品班之末

四十年閏十月禮部以土爾扈特郡王策楞德勒
克來京恭遇

皇帝陞殿奏准入于蒙古王公之次行禮

常朝儀每月五日常朝之期

皇帝有旨陞殿謝恩各官具銜名送鴻臚寺列疏交送
內閣至日五鼓所司豫設案一於

太和殿內之西陳筆硯樂部和聲署入展中和韶樂
於

殿檐前展丹陛樂於

太和門檐下鑾儀衛率官校入陳

法駕鹵簿鳴鞭仗馬步輦五輅馴象鼓吹常朝象依次

如式侍班執事官王公文武百官班位如朝賀儀

右陳設序位

漏未盡王公文武百官朝服外國陪臣以時至者

服本國服畢會

闕下質明侍班執事官入就位鴻臚寺官按翼序定

王公班次由

午門左右門

太和門左右門引入序定文武百官班次由

午門左右掖門

昭德門

貞度門引入又序定外國陪臣班次引隨西班百官

後入咸就位立鴻臚寺卿二人鳴贊官二人詣

乾清門奏請

御殿

午門鳴鐘鼓

皇帝禮服乘輿出宮鴻臚寺卿前導前引後扈如朝賀之儀至

大和殿北階降輿入中和韶樂作奏隆平之章

皇帝御太和殿陞座樂止鑾儀衛官贊鳴鞭丹墀內三鳴鞭丹陛樂作奏慶平之章鴻臚寺官引謝

恩官出班

其餘百官俱按本班立

序立贊進皆進贊跪皆跪贊叩

興王公百官行三跪九叩禮興贊退各復原位立
樂止又贊進鴻臚寺官引外國陪臣進就西班牙
位立丹陛樂作奏治平之章贊行三跪九叩禮畢
鴻臚寺引退復位立樂止乃

賜茶

儀詳三
大節

畢丹墀內三鳴鞭中和韶樂作奏顯平之

章

皇帝還宮樂止鴻臚寺分引王公百官依次出退

右朝儀

臣等謹按中和韶樂每歲十二月各有常朝樂章
依所值歌之其辭載樂考

常朝日坐班儀先期八旗部院寺具朝官名冊送
六科至日黎明王公百官朝服畢會

闕下鴻臚寺官序定王公班位於

太和門外東西各二班按翼分列親王郡王貝勒一

班貝子入八分公一班皆東西面北上

如聖駕巡幸日

王公常朝位於
午門外左右序定百官班次

午門外朝房前東西各九班東班鑲黃正白鑲白正
藍四旗吏部戶部禮部宗人府通政司翰林院詹
事府太常寺光祿寺鴻臚寺國子監吏科戶科禮
科內閣中書欽天監太醫院以次在左翼四旗之
南西班正黃正紅鑲紅鑲藍四旗兵部刑部工部
都察院大理寺鑾儀衛大僕寺中書科兵科刑科
工科順天府京縣五城兵馬司三營以次在右翼
四旗之南公侯伯以下世爵暨文武品官各依序

為位

詳見三大節

皆東西面列坐重行北上糾儀御史

二人吏部禮部司官各二人分位東西班首糾儀
御史二人吏部禮部司官各二人分位東西班末
均東西面北上

右班位

列坐之節春冬以辰正夏秋以卯正屆時門校禁
斷行人糾儀官就位左翼諸王率羣公入

午門左門右翼諸王率羣公入

午門右門就位未入八分公以下文武百官各以次
就位坐吏部禮部官屬受銜名糾儀官起繞班行
視不如儀者糾之上一匝還復位坐少頃王率
羣公出百官皆退

右列坐

凡係

內廷行走軍機處行走及內閣大學士學士官員等
每晨進

內辦事遇常朝日毋庸坐班再上元端陽中秋等日

恭遇

皇帝在圓明園各部院堂官俱宜赴賀或逢朝期該堂官適有帶領引

見之事均免坐班偶遇雨雪各官例免坐班七月初十
十二月二十五日俱係素服之期照雨雪之例毋
庸坐班

盛京常朝儀凡月朔及逢五日

盛京文武官於

大政殿八旗朝堂前坐班其日黎明百官朝服會朝
堂辨定班位鑲黃正白鑲白正藍四旗在東正黃
正紅鑲紅鑲藍四旗在西奉天府堂屬官在鑲藍
之南其班將軍一班副都統五部侍郎一班巡察
御史奉天府尹府丞一班五部郎中佐領治中五
部員外郎五品世職一班五部主事通判京縣知
縣防禦一班七品筆帖式七品世職司庫經歷驍

騎校一班八品筆帖式教授一班九品筆帖式司
獄一班東位西面西位東面皆北上春冬辰正夏
秋卯正就各朝堂前按班列坐禮部贊禮郎左右
各一人自班首繞行受銜名畢少頃各退

八旗坐班儀每月朔及月之十日二十日王貝勒
貝子公暨八旗武官咸補服列坐左翼在東右翼
在西班牙位與常朝日同元日

萬壽聖節前後凡七日上元節前後凡三日上三旗四

品以上官於

太和門外五品以下暨下五旗官於

午門外咸朝服列坐每月左右翼王公分單日雙日
常服列坐班位均如常朝儀

三旗內大臣侍衛坐班儀三旗領侍衛內大臣侍
衛隨侍衛班親軍均分兩翼鑲黃旗為左翼正黃
旗為右翼正白旗半為左翼半為右翼每日黎明
除內外班直宿內大臣侍衛外內大臣侍衛等均

會集於

太和門門左右次各設榻二重東西向散秩大臣以上得與坐本班侍衛按次坐於兩稍間負壁北上東西向鑲黃正黃二旗侍衛在東西三四間一等侍衛齊前楹為第一班二等三等藍翎侍衛為二三四班東西上正白旗侍衛在東西次間各二行北上均北面序坐三旗前鋒護軍叅領列坐於左右門之外各東西向王公入朝領侍衛內大臣以

下咸降榻坐於一等侍衛之前直班侍衛什長令侍衛知會尚茶由內

頒茶左右各二甬至門下兩翼侍衛什長各二人起立視侍衛等分授王公內大臣及前鋒護軍參領一二等侍衛茶宗室侍衛漢侍衛不散茶茶畢以次退如遇齋戒日素服日不

頒茶元日

萬壽聖節前後凡七日上元節前後凡三日朝晡二次

上朝亦如之

內務府官員坐班儀凡常朝內務府總管率所屬文武官於

右翼門外總管於門階上各官以次列坐於階下以都虞司司官察班

皇朝文獻通考卷一百二十七

欽定四庫全書

皇朝文獻通考卷一百二十八

王禮考

四

朝儀

御門聽政

臣等謹案

國初定制每日聽政必

御正門九卿科道各員齊集啟奏率以為常至雍正初

始定

御門之典凡部院折本下內閣者積如干件始得

旨舉行其儀至為整肅至每日

召對內閣部院大臣引覲庶僚咨詢政治披閱章奏皆
臨御內殿寒暑無間仰見

列聖相承敕幾凝績宵旰不遑以所其無逸之心用集萬
年太平無疆之庥猗歟盛哉

順治二年定每日奏事吏戶禮兵工五部輪流首

奏刑部常列三班並令翰林科道同奏事官齊進
侍班記注

康熙六年七月己酉

聖祖仁皇帝親政行慶賀禮是日

御乾清門聽政嗣後日以為常

十三年令各部漢司官照滿司官例隨堂官入奏
十八年九月

諭大學士等朕每日聽政一切折出票簽應商酌者皆國

家切要政務得失所係今後起居注官除照常記注外
遇有折本啟奏俱令侍班記注

二十一年九月定

御門晷刻先是大理寺司務趙時楫疏言

皇上宵旰精勤命部院全班奏事日集午門但諸臣每夜

三更早起朝氣耗傷未免日間辦事反難精密不

若分班啟奏俾其精神適相節養或令滿漢正佐

輪流或將朝期比前量為增益以立不刊之典且

聖躬亦宜節勞平日本章但須封進其緊要事宜必須面
陳者分班啟奏事下九卿詹事科道會議尋上議
言九卿詹事科道官員

皇上不時召問議事仍令每日上朝其餘無事官員及閒
散衙門官員停其每日上朝照舊一月三次上朝
又自古人君從未嘗每日親御聽政即定期視朝
亦未有甚早者今因

皇上宵旰勤勞每早聽政故啟奏官員惟恐遲誤必四五

更趨朝難免夜行風寒之苦若

皇上於辰刻視朝則遠居大小各官黎明而入亦不致遲

誤

上曰朕每日聽政自不可已若定時視朝可免庶僚早起
風寒之累此言亦是黃機魏象樞皆年逾七旬不堪逐
日趨走故具疏乞休已經留任伊等或遇勞頓及有恙
時可令報知本部免其啟奏其餘官員如有疾病不能
上朝啟奏者亦著報部爾等可傳諭詹事科道官員觀

衆意何如再行具奏翼日大學士等奏

皇上洞悉下情慮及下僚風寒欲限時聽政即同天地之

心無不懽忭

上曰朕御朝太早各官於三四鼓趨赴朝會殊為勞瘁自
今以後朕每日御朝聽政春夏以辰初刻秋冬以辰正
初刻為期啟奏各官從容入奏九卿詹事科道原係會
議官員仍每日於啟奏時齊集午門如有年力衰邁及
偶患疾病俱向本衙門說明免其入奏齊集此外各衙

門及部院司屬官員俱停其每日齊集著各赴本衙門辦事每月常朝仍應照舊行

二十三年五月

諭九卿詹事科道等御史衛執蒲奏請御門聽政或以五日或以二三日為期其意蓋欲君臣之間政事餘暇稍得休息也朕自躬親庶政宵旰弗遑念致治之道務在精勤勵始圖終勿宜有間二十餘年以來於凡用人行政事無鉅細罔不殫心籌畫早夜孜孜有如一曰

郊

廟裡享必躬執事間有不親詣之時皆甚非得已至於內
殿齋居幾微悉謹左右贊御咸所稔知在朕未明求衣
辨色視朝日與大小臣工率作省成用熙庶績近念爾
諸臣奏事勞苦少展御門晷刻俾得從容入奏非圖便
安適年海宇敕寧政事漸簡頃復諭部院事務應得歸
併者酌量合奏期於簡要清省從此民生日康刑清政
肅部院章奏當不期省而自省若必預定三日五日以

為奏事常期非朕始終勵精之意也

二十四年五月定大朝之期章奏交送內閣停止
啟奏九卿議言凡大朝之期

皇上視朝最早回宮進講後仍

御門聽政恐

聖躬太勞今四海昇平政事簡少請以後大朝之期及大
雨雪俱停止啟奏遇祁寒盛暑之時間幾日一

御門聽政

上諭大學士等曰朕御極以來孜孜圖治罔有暇逸惟期裨益國家又安兆庶用臻上理非不自知其勞但念庶政叢集一日萬幾若從所請未免始勤終怠且恐不及詳察致有疎畧舛錯于政事得失所關非細自後大朝之期一切章奏交送內閣遇大雨雪臨時請旨具祁寒盛暑之時各部院果無應奏事宜方許暫止啟奏朕始終不欲一念倦怠要安自便也

二十九年十月戶科給事中何金蘭請定

御門之期不允金蘭疏言請酌定

御門之期或三日或五日事應面奏者仍面奏請

旨至尋常奏章俱交內閣照例送進

上曰朕惟致治務在精勤久道期於無斁朕躬親庶政早
夜孜孜靡敢暇逸冀與大小臣工共圖熙績據奏用人
行政條例具舉尋常奏章日煩臨御臣誼難安請酌定
御門之期等語朕三十年來每晨聽政面見諸臣諮詢
得失習以為常今若行更改非勵精求治初終罔間之

道且與諸臣接見稍疏朕衷亦深眷念此奏不准行

三十二年十二月大學士等奏請問三四日

御門一次仍不允先是

上諭大學士等曰朕觀近日政務簡少每日啟奏部院大臣中有年邁者甚屬勞苦自後年逾六旬以外大臣令其量力問二三日一來啟奏至折本內遇緊要事朕有旨傳進爾等方來請旨若無朕旨爾等將折本彙齊亦間二三日一來啟奏尋大學士等奏言

皇上宵旰勤勞勵精圖治天下已享太平政務亦極清簡
臣等敢請每日奏章交送內閣

皇上隔三四日御門一次聽理引見人員與綠頭牌啟奏
諸事似於政事亦不致有悞

上曰朕聽政三十餘年已成常規不日日御門理事即覺
不安若隔三四日恐漸致倦怠不能始終如一矣此乾
清門乃朕宮中亦有何勞但念年老大臣黎明從家中
入奏甚為勞苦故有此諭朕仍照常每日聽政

雍正元年四月

世宗憲皇帝御門聽政時總理事務王大臣等以

聖祖仁皇帝奉安

山陵大禮已成奏請

上御門聽政得

旨

皇考梓宮尚在享殿安奉朕今即臨御正門理事心實不

忍應俟奉安

地宮之後舉行諸王大臣復援典禮懇請再三乃允之

二年定吏部奏事在各部院衙門之後

三年令翰林官四人侍班每聽政日於翰林院編修檢討內按俸以四人侍班班在科道之上

七年十二月

諭內閣十五日御門辦事奏事大臣及引見官員等俱著用補服嗣後朕臨御前殿照常用朝服至御門理事只用補服遇應服蟒袍之日亦著補服蟒袍永著為例

乾隆元年十一月甲午

上御門聽政先是雍正十三年十二月

諭曰據禮部奏請初十日御門辦事朕查雍正元年四月間諸王大臣奏請御門聽政

皇考聖意欲俟

山陵禮成之後經王大臣再三懇請始降

旨允行計已五閱月矣今百日甫過朕即臨御正門理事

心實不安朕受

皇考付託之重所有國家政務在便殿隨時辦理不敢畧
有曠廢其御門之典俟明春再行請旨至是年二月
復奉

諭曰禮部奏請二月十三日御門聽政朕思百日之後
雖閱兩月但

皇考梓宮現在雍和宮朕即御門聽政心實不忍可俟
梓宮奉移

山陵後再行請旨十月奉移

世宗憲皇帝梓宮禮成至是月

上始御門理事如儀

二年六月甲戌

上御門聽政以過雨賞諸臣紗有差

諭曰連日仰蒙

上天降賜甘霖衆心感慶朕今日御門聽政復值澍雨再降更為優渥念諸臣衣服未免霑濕大臣等著賞紗二疋凡陪奏侍班引見執事官員及侍衛等俱著賞

紗一疋

十一月戊子令

御門日設氈墊於大學士等跪所

諭曰向來御門聽政大學士等俱不設氈墊惟圓明園
奉

皇考特旨鋪設而乾清門尚仍其舊原定制之意蓋以君
尊臣卑預防專擅之漸然亦不係乎此況古有三公
坐論之禮大學士等皆年老大臣當此嚴寒就地長

跪朕心特切軫念嗣後著鋪氈墊以示優禮至意

癸巳令翰林院修撰編修檢討俱懸帶數珠

諭曰朕御門聽政之時翰林院修撰編修檢討與科道一同侍班翰林班次在科道之上科道懸帶數珠而翰林未有定制朕思侍從之臣理應畫一副後修撰編修亦著一體懸帶數珠以肅朝儀

御門聽政儀常日部院章奏未奉

聖旨者折本下內閣積若干件得

旨

御門聽政內閣宣布在京部院寺各部院寺官檢所應

進奏事於函飭陪奏官屬

各部院均以滿漢司官二人陪奏

吏部

轉飭侍班官

先期各部院具所屬滿漢官各四人考語移送吏部恭遇御門聽政

吏部按序列名單以十人隨班引見亦曰侍班

具吉服

朔日逢五逢十日公服

期畢會

右戒辦

至日所司設

御榻於

乾清門正中榻前設章奏案一辨百官班位

乾清門侍衛在

御榻左右翼立領侍衛內大臣內大臣散秩大臣及豹
尾班執槍侍衛佩刀侍衛在丹陛下左右立東西
面記注官在西柱下立侍衛翰林科道官在西階
下立皆東面大學士啟奏折本在

御榻之左內閣學士在其後少南為部院官奏事位尚

書左都御史在前侍郎副都御史大理寺卿少卿
次之陪奏官又次之皆西面以戶部禮部兵部工
部分日首對三法司直第三班吏部直第六班若
宗人府奏事則在各部之先

右班位

漏未盡部院寺奏事官暨侍班官畢集朝房進至
中左門祇候春冬辰正初刻夏秋辰初初刻進至
後左門祇候侍衛轉奏得

旨百官以次進至

乾清門丹墀東西面魚貫序立記注官翰林科道官
於西階西東面序立

皇帝御輿至門啟扉降輿出闔扉

陞座翊衛如儀記注官由西階升至西柱下就位立部
院奏事官由東階升尚書一人奉疏折旋而西餘
入就位西面跪奉疏者至正中北面詣奏案前跪
恭設於案興少退趨至東楹轉入班跪奏某事畢

興少退循東階左降其次各班依序升東階進奏
如前儀至吏部奏事引

見侍班官畢退內閣侍讀學士二人升東階詣奏案前
北面跪舉本日奏函興退翰林科道及侍衛皆退
右進奏

百官既畢奏內閣滿學士一人

本日先期派出奉折本函

升東階折旋而西大學士內閣學士從升依次就
位跪記注官進至

御榻之右仍東面立奉函學士至正中北面詣奏案前
跪恭設於案啟函取折本依序啟奏

皇帝降旨大學士學士承

旨訖興由東階降記注官由西階降

皇帝還宮各退恭遇

聖駕駐蹕圓明園

御勤政殿聽政奏事及啟奏折本皆如前儀

右啟奏折本

皇朝文獻通考卷一百二十八